

Unsay Mahitabo sa Buhi ug sa Patay panahon sa Ikaduhang Pag-anhi ni Jesukristo?

MANWAL SA SEMINARY ALANG SA BAG-ONG TUGON

Basaha ang 1 Mga Taga-Tesalonica 4:13–18, nga mangita og panabot mahitungod sa unsa ang mahitabo sa mga matarong inig si Jesus mobalik pag-usab. Timan-i ang kalahian tali sa unsay mahitabo sa kadtong nangamatay ug sa kadtong mga buhi pa panahon sa Ikaduhang Pag-anhi.

- Unsay mahinungdanon alang nimo niining mga bersikulo?

Sunod, basaha ang Doktrina ug mga Pakigsaad 88:96–98, nga mangita og dugang nga mga panabot mahitungod niini nga mga panghitabo. (Mahimo usab nimong basahon ang mga bersikulo 99–101 aron makat-on mahitungod sa unsa ang mahitabo sa kadtong wala midawat kang Jesukristo niini nga kinabuhi.)

- Unsa ang dugang nga mga panabot ang imong naangkon?

Usa ka kamatuoran nga mahimo nimong maila mao nga **ang matinud-anong mga Santos kinsa nangamatay sa wala pa ang Ikaduhang Pag-anhi mabanhaw inig si Kristo moanhi pag-usab.**

Ang termino nga “gisakgaw” (1 Mga Taga-Tesalonica 4:17) nagpasabot sa mga matarong nga maghiusa sa pagsugat sa Manluluwas sa Iyang pag-anhi. Daghang mga Kristiyanos ang naggamit sa pulong nga *pagbayaw* (gikan sa Latin nga termino nga nagkahulogan og “misaka”) sa dihang nagtumong niining panahona.

Si Elder Neil L. Andersen sa Korum sa Napulog Duha ka Apostoles mipaambit sa mosunod mahitungod niini nga sagradong panghitabo:



Walay makadasig sa akong tinguha sa pagpamulong bahin ni Kristo labaw pa kay sa paghanduraw sa Iyang pagbalik. Samtang kita wala makahibalo kanus-a Siya moabot, ang mga panghitabo sa Iyang pagbalik makapahingangha! Siya moabot sa mga panganod sa langit diha sa kahalangdon ug himaya uban sa tanan Niyang balaan nga mga anghel. Dili lamang pipila ka anghel, apan ang tanan sa Iyang balaan nga mga anghel. Dili kini ang pulahon og aping nga kerubin nga gipintal ni Raphael nga atong makita sa atong mga Valentine card. Kini mao ang mga anghel sa mga siglo, ang mga anghel nga gipadala aron pagpatak-om sa ba-ba sa mga liyon, nga moabli sa mga pultahan sa prisohan, sa pagpahibalo sa Iyang dugay nang gihulat nga pagkatawo, sa paghupay Kaniya sa Getsemani, sa paghatag sa Iyang mga disipulo og kasiguroan sa Iyang Pagkayab, ug sa pag-abli sa mahimayaong pagpahiuli sa ebanghelyo.

Makahanduraw ba kamo nga bayawon sa pagsugat Kaniya, niini nga habig o sa pikas habig sa tabil? Kana ang Iyang saad ngadto sa mga matarong. Kining talagsaon nga kasinatian moimpluwensiya sa atong mga kalag sa kahangtoran. (Neil L. Andersen, “Kita Naghisgot Kang Kristo *Liahona* Nob. 2020, 91)

Paggahin og panahon sa paghanduraw kon unsa kaha kini mahisama nga maihap nga apil uban sa mga matarong sa pag-anhi sa Manluluwas.

- Unsa nga mga hunahuna o mga pagbati ang lagmit anaa nimo nianang adlaw? Unsa ang imong gibati sa pagkasayod nga ang Manluluwas gusto nga mouban ka Kaniya sa Iyang pag-anhi? Sa unsang paagi nga ang paghanduraw niana nga umaabot nga adlaw nakaimpluwensiya kanimo karon?

Sa 1 Mga Taga-Tesalonica 4:18, giawhag ni Pablo ang mga Santos sa “pagdasigay [sa usag-usa] niining [mga pulonga].”

- Sa unsang paagi nga ang mga pagtulun-an ni Pablo nakahatag kanimo og kahupay? Sa unsang paagi kini makahatag og kahupay sa umaabot nga mga kahimtang nga lagmit nimong maatubang?